



Ворңа хатлэв постасэв

Тампуш, тутаң ищки хатлат юпийн, роман мелақ па хопам хатлат ёхатсат. Щи мелақ хатлат пидна па ворңайт Овас мув педа йисат. Щишан, хой тахаятан тухалд мохет нох аматман емаң хатлэв олңашак постасэл.

сат, хун олаң ворңайт ёхатты юпина тылащ энамты питас – щи хаталн щи емаң хатл лэщатыса. Щалта елды, хун Овас мува рушат ёхатсат па лув емаң хатлэд постаты питсэл, щиты кат емаң хатл волды илеп ванан питсат. Благовещение нэмпи емаң хатл 7-мет хатл ун кер тылащн порылдыла, щишна щи Ворңа хатл ищи хатална постаты питса.

Дорвош район Ханты-Мужи куртна хащам лапатан Ворңа хатл постаса. Мойң хоятат, кум шитман, Васёханов па Мужи элты ёхтыдысат. Турам педа пойкащсат, нэман лэщатом эплаң лэтотат тутдысат па порылдысат. Кашң

хоттэд ёх щашкан шук карты ох пидна сумта ярсат.

Кев сыл район Охсарвош унт пуңална хантэт па ур ёх емаң хатлэд ищи постасэл. Олаңна турам педа пойкащсат па сумта щашкан шукат ярсат. Районной каш верты хот элты рупитты ёх касапса па араң-монщаң ёнтапса лэщатсат. «Овс мув нэ» ханты араң группа па «Ялэмд» ур ёх араң группа хорам ардал пидна нох доймтысат.

Щи хатална холна пирыса, хой мет хорам ворңа хорпи сох лэщатас, па хой мет эплаң лэтот кавартас. Алла Тайшина па лув Никита хилэл пидна нох питсаңан.

Там лапатан Ворңа хатлэв холна постадэв. Щутцаты хат-



Хор: Венера Жуминова

латан шоши хоятлув уйтан тылат па порылдылат.

Хор: Светлана Пырсева



Мет олңа, катра йис элты, Ворңа хатлэв постаса хун нови атаң хатлат этты пит-

«Сорни най» Нижневартовск вошан

Ханты арат арыты нэңат Дорвош элты Ёмвош мува яңхсат. Нижневартовск вошн ай кер тылащ 4-мет хаталн Ворңа хатл постаса. Аратл тохи кат

щёрс ветсот молтас мойң хоят ёхтыдымал.

– Хун емаң хатлэва лэщатыты питсам, ма нумассам, мосал рут муvem, Дорвош районэм элты ханты хоятлув вохтыя. Щиты «Сорни най» араң нэңат Дорвош элты ты йиты номас понтсат. Щишн, ох кашты питсам. Манэма «Роснефть» хоца улты «Самотлорнефтегаз» элты нёттап верса, 200 щёрс солкувайна масайм, – Екатерина Сергеевна Жукова (Хунзи) ястал. – Щи охламна касапса версам, хой хорамшак ворңа думатты сох лэщатал. Нэман мойлапсайт лутсам. Щалта вохам мойң хоятлам ураңна манты юшлад па 2-3 хатл улты сыс сохаштыслам. Шеңк умащ, хоты муң шоши хоятлув ханты ясаңна арысат па яксат.

– Муң шеңк яма яңхсув! Туп вохсаюв, муң 8 хоят, мохты кашащсув! Щикем ям, умащ ус па мува яңхты. Ханты арлув па яклув эталтыслув. Ворңа хатална ар хоятат пидна уйтантысув па потрэмисув. Иса тый-тохи яңхам юшев пайды ус! Папуш па та-

миты мосал уйтантыты! – опи сакңан, Валентина па Любовь Кондыгинңан ястасңан.

Тамащ уйтантыты лотат па муvн улты шоши ханты рутлув пидн мет мослат.

Иван Сандрин ханшам потар

Хор: Валентина Кондыгина



Хор: Екатерина Жукова

Законат ханшты ёх уйтантысат



Совет Законодателей – щиты хулам регионан законат лэщатман рупитты ёх айлдайт. Лув хольмаң молтас тал ияха уйтантыдат па шоши хоятлад кеша улапса кенашак верты ураңна нэпекат лэщатлат.

Тюменской, Ёмвош па Ямал муват элты закон нэпекат лэщатты ёх там хащам лапатн

41-мет заседание верыдысат. Уйтантопса лотал Пулцават вошн ай кер тылащ 5-мет хатадн улмал.

Там уйтантопсайн лув потарсат, хоты мосал елды йи номас понман улты. Хон мувев куща Владимир Путин, там талэв арсыр рут хоятат ияха духса улты тада нэматсалды. Щишна щити мосал кашң хоят, кашң

хоттэд хон мувев ловатан мосман тайты па шавиты.

Овас мувевн улты шоши шимлаң рут хоятдува ищити онтас мосал верты. Щити щирн, верат хоты мандат, Иван Иванович Сакал потартас: «Тамхатл Ямал мувев ловатна 44 нэтап щир шимлаң рут мир хоятлуд кеша лэщатман ул. Ар пелкал хул ведпаслаты

па вулды тащ шавиты хоятлуд ураңна».

Айлат ёх ал щиты ищити ант омассат. Лув верлад туңапты ураңна Тюменской, Ёмвош па Ямал мувна улты энамты ёх кеша ияха ёшпос понтсат. Щити щирн лув кутладн нётман рупитты питлат.

Иван Сандрин ханшам потар

Няврэмат щутщаты пора

ЯНАО айлат ёх верат туты департаментан номас понтса, ялша ёхатты луңан хут щёрас молтас няврэм хошам муват педа щутщаты туттыты. Тампуш, щутщаты манты эвет-похат кеша, нялгьяң педа кат смена Тюменской па Калужской областятан, Республика Крым па Краснодарской мув сылан лэщатла.

Луңан щутщаты яңхты ураңан, ун кер тылащ хутмет хатл элты ЯНАОтдых порталан, льгота тайты няврэмат кеша заявочной кампания пуншса. Ун кер тылащ хуламхощьяңмет хатл элты хащам няврэмат кеша заявка рахал маты. Тампуш вошат па районат кутан, заявка маты хатлат ятаңа шуписайт, шаңкап имохты ар заявка ант маты ураңан. Щити порайн ванта ЯНАОтдых порталал

кентат рупитал па вер мохты ел сохнал.

2026-мет тал тумтак улты тада постаман ул. Щити ураңан, мушаң няврэмат яммалты кеша, там тал олаң пуш кат атэд смена лэщатса. Лавартан шушидыты па сэм мушат тайты эвет-похат щимащ сменная яңхты верытлат.

Аңкет-ащет пошхиелал щутщаты киттыйн, юш ох туп сохапталат. Тылащ ох шимла хойты хоттэллат па ащилал СВО харан улты няврэмат юш сахат сохаптам охлад цаха ёхды кератлайт. Щимащ нэтапса тал ипуш улдыйл.

Хоят молты инщасапса тайлки, мосаң па заявка маты вер ант тыйл, рупитты хатл сис там номерат хуват рахал потрэматы: +7(912)071-50-37, +7(912)-50-39.

Зоя Куртямова ханшам потар

Ялап нэтапса

«Мурах» карта хуват ялап нэтапса этас. Йиңк хуват яңхты тутаң хопа юш нэпек луттыйн, тынал еша тындышак питад. Хутьяң солдува элты щёрас хутьяң солдува унты тынал ёхдышак сохнал.

Луңан, Суматвош – Мужичи – Пулцават юш хуват па ай куртат кутан яңхты катьрата тындышак юш нэпек лутты рахал. Товийн, Пулцават – Лапатнаңк вошат кутан яңхты воздушной по-

душкая «Мурах» карта ищити лэщалад.

Туп юш нэпек лутты порайн, «Мурах» проекта ханшлтам карточка хуват охал сохапталы мосал. Па карта хуват лутастыйн, нэтапса вер ант луңтасал.

Там карта 2022-мет тал элты рупитты питас. Округеван хуламсот хутьяң молтас хоят нэтапса туты карта ёшан тайл. Тунял «Мурах» карта хуват хут миллион пуш нэтапса вер верса.

Зоя Куртямова ханшам потар

Юшат вантман тайлайт

Хащам хатлатан округ ловатан хошам хатлат лойлат. Щити веран юшат нэхлаңа йиты питсат. Сулак лонщ ин кашң тахайн кашадалы рахал. Ёханат ин ешауд щити эпатты питлат.

Щити веран ин округ ловатан манты машина юшат вантман тайлайт. Мет шопаң Лапатнаңк – Харп хоша улты нормат, Охсаркурт па Натаң – Пулцават юшат. Ёханатан еңк лодаты питас. Там рупата верты ураңан нэман хоятат

миталаман улдат. Лув кашң хатл там юшат хуват яңхлат. Арталадат, мата тахайн молты сортамтас муй па антом.

Хиш па кев сопасламаман тайла, ванты йиңк эпатты порайн щий туты ураңан. Ун кер 15-мет хатл элты тылащ сис ун машинайт ант эсадлайт. Луң сис нумасла 100 километра регион юш лэщатты па 35 километра воштан ялпидалы.

Аллина Тоярова лэщатман потар



Хор: ЯНАО губернатор пресс-служба

Ай ханты курт элты мир ловат унты

Россия первенство хон мувев ловатан уламан, Питлор курт элты улты энамты няврэм Кирилл Хартаганов лаварт карты шуп нох адамман касман одаң места шитас. Касапса Тула нәмпи вошна курк тылац 16-22-мет хатлатна вус, хота лув аратл 407,5 килда нох адмас, кимет места элты 67,5 килдайн аршак.

Кирилл Хартаганов – кандидат в мастера спорта, Россия хон мувев сборная хоца лоңман ул. Лув сәма питас ван хатлап тылац 6-мет хатл 2006-мет талн Мужн вошн. Сәма питама юпина Питлоран энмас па ус. Щит лув шоши куртал, опрацдал щилта улдат.

Ащел, Геннадий Филиппович, худ па вой велпасламан ул, антед – Оксана Иосифовна, куртаң леккар хотн рупитал. Лын худам няврэм тайлаңан. Няврэмдал кутан Кирилл мет ун, щалта кутпад – Анна, айшак похиел – Семён.

Кирилл Питлорна 11 класс етшаптас па ин одаңмет курсан Шадринской государственной педагогической университет хоца «Технология па информатика» щирн уталтыял. Эви апщел па Ёмвош технолого-педагогической колледж хоца уталтыман ул. Мет ай апщел Питлор ашкулдайна 5-мет классна уталтыял.

Лапатмет класс 14 тал ловат элты, Кирилл самаңа тайты верал туты питсалды. Район ловатна нох питас, елды па Пулцавта ЯНАО первенство хоца китса. Щилта щн елды касапса юшад манты питас.

– Ма водаң касапса педа манты номас ант тайсам, туп порайн турник хоца нох щакардысам па щн. Щн порана ма ловатэм энамты ёх иса щн турник па брусья хоца пора хайман, ашкуда юпина, нёхамтысат, – Кирилл потарл. – Имомтына муң хоцаев, ашкудая, айлат



Хор: Кирилл Хартаганов

уталтыты ху, Георгий Осинцев, ёхтас. Лув муңев акатты питас па ялап секция пуншас, хота пауэрлифтинг па гиревой спорт щирна муңев уталтаты питас. Щн касапса щирна мосал лаварт карты шупат нох адамты. Манэм щимац касапса сама рахты питас. Елды па район ловатна касапсая китты питсаям, щита одаң местаят вуты питсам. Щн онтасна касапсаем мет самаңа тайты питсэм. Ходна ямашак уталтыты питсам.

Щалта елды, 2023-мет талн Россия первенство хоца Кирилл 3-мет места шитас. Амтам рувн, ходна ямашак лэщатыты питас.

– Там касапсайна ма щн ловат аматсам па нумасты

питсам, мосал ищи па нох питты, одаң местаят шитты мослат, – Кирилл Геннадьевич ястал. – Кимет, 2024-мет талн Россия Кубок пауэрлифтинг хоца мойлапса питама ураңна ма кандидат в мастера спорта нәмн юкантсаям.

Тунял, 2025-мет тал сус пораян Кирилл Россия Кубок хоца Курган нәмпи вошан 2-мет места шитас. Касапсая 300 юраң хоят 53 регион элты ёхтылдыс. Щн кутна муң ханты айлат хоятэв лув юрл такан эталтасды. Щн ураңна лув Россия сборная хоца ханшлтаса.

– Тампуш, Ас нопатты тылац 5-10 хатлатн ма па Китай мува Хайнань нәмпи пухра китляям,



Хор: Кирилл Хартаганов



хота ма шоши Россия хон мувев ураңна касты питдам. Щн аратл ун мирэв элты арсыр па муват элты мет юраң хоятат ёхатлат, – Кирилл потарл. – Манэм шеңк умац, хоты ма ай куртые элты, ай шимлаң ханты рут элты мир ловатна юрэм эталтадем. Елды па шеңк такан лэщатыты па нохды, одаң местаята, уратты питдам.

Муң шоши энамты хоятэва ям ясаң ясталув, ям номасн ат уталтылд па касапсайдал хоца яма лэщатылд. Номас понлув, мир ловатна, ханты няврэмев нох ат питад!

Иван Сандрин
ханшам потар

Кев тум пелка касалты пора ёхтас



Хор: Екатерина Озелова

Хойтат кум ант шитсат ун воша яңхты, дув куртаң дапкыйдаң дэтот лутсат. Итух-дат Мужи вош дапкыйтан дэтассат. Мосты шук дэтотат, муй сама рахал, тащ хотаң хоятат дув ши лутсат. Мет такан мосты: нянь, пудка дат, шай па саккар так юш хуват хотата тусаят. Ши тумпина тампуш ялап паршин сыхат, нуйт па карты курат Дорвош район утхот эдты масайт. Ёх ялап паршин сохат па реци-на сопекат каншсат. Муй мосты пормас – иса ши патан дэдсат.

Ешауд ашкуда няврэмат айлта ёхи эсалты питдайт. Патан ханшты нэпекат па книгайт вулат. Луң сыс ханшты па луңатты мосал. Няврэмат аматман хотата мандат. Сустал давдассат, хун антидал-ащилал па авкайдал хоша ёхи эсалдайт. Дув ёхи ёхатман яма нётлат. Касалты порайн рупата ар: хот лосытты па донщты, сох ват ухлата хушты, донщ па йиңк адты, юх эватты па сэварты мосал. Хота юр ёхатл, щита нётлат. Антидала-ащилала, касалты порайна, щимащ нэтапса мохты ши кеншак.

Одаңмет вуды тащ сельхоз-предприятие «Мужевское» хоша рупитты ёх пилна еша потрэмисув па иншассув, хоты дув Кев педла манты лэщатыдат.

– Ма ашкуда юпина мохты ёдан хащсам. Яйдам-опидам иса воштан улдат. Хотан ищи мосал рупитты. Опращдам юш нюхадлэм. Тови мелақ пора сора ёхтас. Ин елды касалты мосал. Ешауд дэттасты питлуд. Дэтот лутты охна совхоз эдты холна ант масаюв. Муй шоши ох тайлуд, щитна ши лутасты

Тампуш, ищки хатлат юпийн, роман мелақ тови хошам хатлат ёхатсат. Донщ роман додас па Ас еңк эдты йиңк этас. Хатлат хува йиты питсат. Тащ хотатн рупитты хоятат кеша Кев педла касалты пора ёхтас. Дув ин дэттасты питсат. Ун юш ям эдты, тухдат ун вошата, Пулдавта па Лапатнаңка яңхсат. Щита, ванты, дэтотдал па пормасдал тындышакат. Па муй сама лэщалад, щит вулат.



Хор: Иван Сандрин

питлуд. Пулдавта лутасты манлуд. Ар пормас патан ант тулуд, даварт питад. Шеңк

такан нянь мосал, – вулэң ху Пётр Артеев ястал. – Елды Танюва хоша касаллуд, щита



Хор: Екатерина Озелова

холап омасты рахал, ялап хул дэлув. Сорам хатлатан нянь ванщты па соралты питлуд, ант ки ванщлэв – вонщала мандат, хишидалайт. Нянь соралты сыс суовлуд еша энамлат.

Хоты ши едпийн, 20-30 тал хащаман, Кев педла манты кеша лэщатысат, муңев Любовь Романовна Озелова каматса ясаң ястас. Дув ин пенсияйн щутщаман ул. Пора хайман хота яңхал, няврэмдала па хилыдала нётал.

– Кум шитман вуды хота ий-икем пилан яңхламан. Уталсув иса ёлах тахайн улды. Щиты антилуд-ащилуд, няврэмдам ун антет па ун ащет яңхсат. Ияха усув, касдысув, – Любовь Романовна потарал. – Катрашак, 80-90-мет талатн, муң совхоз эдты ох юкана дэтотан мийдысаюв. Лэщалад наңен ант лэщалад, хойн иншаслаюв. Муйн малайн, ши дэтот ши тулан. Ин там йис дапка тэдыя, хоятат муй сама рахал, муй мосал щит лутлат, туп ох тайты мосал.

– Муң тампуш олдашак лутасты па дэттасты питсув. Туняд талатна ёхи хащман па йиңк-нёнхал кутна дэтотат пилна таласысув. Щишна тампуш олда ротая айлта мосты пормас лутсув. Пулдавта вер сахат яңхман, айнайн тал сыс шук дэтот вусув, – одаңмет тащ куца ху Виталий Озелов айкел китас. – Кашң тал дэтот тынаңа йил. Мосты пормас ищи тынаң. Щишна тал сыс ох сопасысув.

Сус пора унты сопасыдым дэтотдал тарамлат. Вулэң ёхлуд Кев тумтака ат уншлэд па тащдал уна ат энамлат.

Иван Сандрин ханшам потар

Няврэмат рут ясца уталтаты хоятат касапса ус

Хаццам лапатам, няврэмат рут ясца уталтаты хоятат кутан касапса ус. Ашкулдайн па хатл сус ай няврэмат пидан рупитты хоятат, хулам хатл онлайн ширн, лув рупитты верэд эталтасат.

Няврэмат рут ясца уталтаты хоятат урок па классной шёс масат, рупатаед элты нёхты хор альсат па потарсат муй кеша там рупата верлат.

Там касапсайн, ар хоят кутан, Лорвош ашкулдайн па няврэмат хатл сус шавиты хотан рупитты ханты нёңан одаң па кимет тахая этсаңан.

Ай няврэмат пидан рупитты нэ – Юлия Егоровна Максарова пидан касапса манам вер элты еша потрэмисам.

«Хольмаң молтас тала йис, хоты ма Лорвош куртан, ай няврэмат хатл сус шавиты хотан рупиттам. Шалта па ханты улапса альты, ясаң уталтаты «Найие» кружок тулам.

Касапсаев онлайн ширн манас. Манэм мосас няврэмата, антета-ашета па няврэмат уталтаты хоятата хулам арыср урок маты. Няврэмат пидан муң потарсув, муй хорпи ханты емаң хатлат улдылат, думатты сохат па ёнтотат тайлат. Шалта па «вотрув вохты» ёнтотан ёнтсув, ханши оляпан нёсытсув.



Наталья Анатольевна Лейпозжих

Брифинг манам порайн кат ясаңан потарты няврэм, маты ясаңан нумасал па маты ясаңан потартал, щимащ инцасапсайн ма масайм. Вет минут сус ёхды потар маты мосас. Касапсайн кимет тахая этмем юпийн, ад па шир-щира потрэм тусэм.

Ма рупатаем ма дыпема шеңк рахал. Тамаш касапсаятан кастыйн, верты рупатаен пуңалта па щиран ныда. Муң хошты рупатаев хоятата альдэв па па хоятат элты ялап щира уталтылдув», – Юлия Егоровна ястас.

Наталья Анатольевна хус молтас тал Лорвош ашкулдайн уншак няврэмат ханты ясца уталтал. Касапсайн одаң местая этмад юпийн, Хон мув доват няврэмат уталтаты хоятат кутан, Ямал мув элты елды касты манал.

Зоя Куртямова ханшам потар

Хон Петра вошан мойлапса шитам эвет

Ай кер тылац хаццам хатлатан Хон Петра вошан «Сохраняем традиции» XII Международной фольклорной фестиваль манас. Хон мувев арыср вошат па кургат элты арыты па якты няврэмат яха уйтантысат. Китай па Малайзия мув сыд няврэмат кина эталтаты хошап хуват там фестивалы пилташсат.

Там уйтантопсайн, хут тал элты па уншак няврэмат яксат, арысат, лув рут мир улапсаед па думтам сохат эталтасат. Мужи вош элты, Любовь Григорьевна Витязева «Хатл най» группайн арыты эвидал пидан ищи тохи яңхсат.

Хорам турсыйң эвилув кимет степень лауреат ишакты нэпекан масайт па «За сохранение традиций» водаң мойлапсайн па яң шёрас ох нэпекан мойлаптасайт. Атэд ар арийм Анастасия Молданова худмет степень лауреат ишакты нэпек шитас.

Касапса тумпийн, яңхам эвилува, Хон Петра вош хорам тахайт эталтасайт. Кев хорат вантсат, катра пормас шавиты па Турам хотата доңтысат.

Муң па Любовь Гавриловна мойлапса ясаң китлув. Щи доват ун касапсайн, мойлапса шитты елпийн шеңк ун рупата верман ус. Уталтаты няврэмат нох питтыйн, уталтаты хоят верты рупата велци ныда.

Зоя Куртямова лэщатам потар



Хор: Любовь Витязева



Хор: Юлия Максарова

Юлия Егоровна Максарова няврэмат пидн.

ОБЪЯВЛЕНИЕ

Там QR-код хуват доңаты па вантаты, муйсыр нётопсайт СВО хоща улты мохета малайт. Щи тумпийн нёңлада, няврэмлада, аңкидала па ацидала ищи нётопса вуты рахал.



СЛУЖБА ПО КОНТРАКТУ В ВС РФ

полная информация по телефону
+7 (902) 816-11-90
+7 (34922) 3-98-08
звонки по России бесплатны

ВРЕМЯ ДЛЯ ВАЖНЫХ РЕШЕНИЙ!

КОНТРАКТНАЯ СЛУЖБА
6 700 000 Р
ЕДИНОВРЕМЕННАЯ ВЫПЛАТА
4 000 000 Р

ПРИ ЗАКЛЮЧЕНИИ КОНТРАКТА НА ЯМАЛЕ

Прибывающим из других регионов возмещаются затраты на проезд от места проживания до г. Салехарда. 3-разовое оформление проживание в г. Салехарде и 3-разовое питание предоставляются бесплатно.

ОБУЧЕНИЕ:

- ✓ ОПЕРАТОРОВ БЕСПЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ
- ✓ МЕДИЦИНСКАЯ ПОДГОТОВКА

3 600 000 Р единовременная выплата 400 000 Р минимальная сумма
до 120 000 Р срочный на контракт заключение военного социального контракта

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО **от 225 т.р.**

Сорашак айкед мощатты ураңан

«Лух Авт» газета кашң лапат йи пуш этдыйл. Тухад ишан, ёхаттал унты талаң лапат хащал. Щи веран, сорашак айкедат мощатты ураңан, нынан мосал «Лух Авт» поныдыты айкедат «ВКонтакте» па «Одноклассники» хоща мощаттыты.

Щи ураңан там QR-код мохты доңаты, па муң верыдыты айкедлува ханшлтыгыты. Кимет веран, айкед луңатты тумпийн, щита рахал ясаң ханшты, потран сама ки рахас – пос понты.

Муң па, нын вантам айкедлан элты ищи нопсэв тыед-тохел понылдыдэв, вантлэв – мата айкедат па муй элты хоятат луңатты лаңхалат.

Тумтак ёшна, тумтак курна ханты мир улапсаев ияха понасман елды тулэв, ханты мир ясең шавилэв!





Вудыйн кирам ухлат касты питсат.

Хор: Владимир Енов

Вулэң па вой-хул велпас ёх актащисат

Хащам ятан Русскинской куртан Сурханл районан «Вулэң па вой-хул велпас ёх» емаң хатл манас. Щимащ волаң вер ям хуван лэщатса. Кашң тал рут ширн луңтасты муватн хантэт ияха ёхтыдылат, уйтантылат, дыв кутэди ар айкел оша паятлат, потрэмалат, муй верат туса верлат, арсыр касасэст дыв кутэди лэщатлат па вудыйн кирам ухлатн касдат.

Тампуш Русскинской куртэв кутопн ямкем ар хатнэху арпелак эвалт ияха актащас. Хантэт тый емаң хатлэл постаты ёхатсат, щалта па сыр-сыр мират эвалт улты хуйт-нэчат щимащ умащ па хорамаң вудыйн кирам ухлатн яңхты касасэст па там емаң хатл ванттыя иса арпелак вошат па куртат эвалт ищиты тамхатл тый ёхтыдысат.

Емаң хатлэв туты хоятат айлат ханты хуйт-нэчат арсыр касты щирата хушидысат. Щи отат кутн щимащ касасэст усат: тынщаң сува ёвалматыя, ухлат шоппи наварматыя, катдасыты муй вудыйн кирам

ухлатн касты верат. Иса нийл щёс вуш эвалт па хатл кутоп унты ху ёхат муй нэчат дыв кутэди вудыйн кирам ухлатн навралтысат. Тампуш щи касасэста араттэди 35 вулэң ухал япсыена лэщатсат. Касты харн ма касасэст туңа-щира па туса арталаты хатнэху Зинур Айнуллин пидан уйтантысам. Лувел инщасэм, хоты там кутатн хантэт кассат. Лув па тамиты щи нюхмас, матты касасайн удам ханты хуйт па нэчат вудыдал шеңк яма тампуш хухалсат. Туп шеңк ар хатнэху онтасан, итухал вулэт шеңк



Хор: Владимир Енов

Касасая лэщатылат.



Ханты нэчат вулэң ухалан навралтылат.

пакнаптысайт па щи патыйн юш эвалт ёвра мантсат.

Щалта тата тынасты-лутасты хар ханты ёхлуд-нэңлуд Русскинской курт хоща пуншидысат. Щита вуды, кураң вой, лук нёхи лутты рахас. Щалта потам сортат, ев, мевты, щапар, сархат велпаслаты хоятатн яма тынысайт. Шеңк ар арсыр вонщамот моцатты верытса. Мойң хоятат шеңк ар вуды нёхи тата лутсат.

Вулэң ухлатн касман, ёхат кутан мет олңа Леонид Комтин ёхтас, нэчат кутан – Олеся Тэвлина. Дыв мет ун мойлапса холамсаңан – щит «Буран» нэмпи тутаң ухал. Кашң хоята маса. Кимет па хулмет – Андрей Сопочин па Денис Комтин усңан.

Нэчат кутан кимет муй хулмет тахет Анастасия Комтина па Ида Сопочина тампуш моцатсаңан. Дыв ищиты арсыр тынаң мойлапсаятн ун куца ёхлудн юкантсайт. Шеңк яма там тови мелак хаталн, ищи курумн Русскинской куртан ханты ёхлуд емаң хатл манас.

Владимир Енов ханшам потар



Емаң хатла ёхтам хоятат курт хары кутопн.

Хор: Владимир Енов

Сот Панны Ар Панны Ики

– Ивлап-аслап! Шанш вояң нёхи лув холща вул, ивды-асды эвел? Хоратты ант хошлан! Щиты наң хорта: «Хала ловаң тэдаң ухад талад, доңхи ловаң тэдаң ухад талад, холдаман-инщдаман таласал».

Порнэ худантыйл, икел яна арийл. «Муйл арийл? Ал холдал!».

Порнэ ими ёхи лоңемал. Амплэңкел па щити хоратал: «Во-во-во! Сот Панны Ар Панны Ики ивды-асды эвел элты шанш вояң, мевал вояң нёхи тэдаң ухад талад, арыман таласал, монщман таласал!». Па хоты, икел яна арытал. «Аңканэ, аңканэ! Па наң арыты муйн шохртыдайн, ивды-асды эвен хоща яңхсан». Сот Панны Ар Панны Ики ястыйл: «Ал арыдам!».

Ин молты хир ов эңхопла – иса шанш вой, иса мевал нёхи! «Аңканэ, аңканэ! Ивды-асды эвен хоты яма щити питмал. Иваң-асаң эвен па лэщатлэм: хун тамкем, ал ямшак!» Икел ястал: «Ит яма питама сахат хол хун яма питлат». «Иваң-асаң эвен лэщатлэн ки, тамкем хун, ал ямшак!».

Икел, таңха, тура ёхтапталды. Ин ики, шушидытал сахат, иваң-асаң эвел па щити унтан хотан вердалды.

Эви унта туты питла: войи сохтапут, шумах кушам, кат кеши, кат дайм, кат ан, кат пут. Иса тэлыя лэщатса, унта щити туса. Ин ащел ики, таңха, ёхи йиты юпийн етная йис. Олтад сахат эви худал:

– Хоты, иваң-асаң эви, улдан хотэн лыпийн?

– Улдам!

– Ан, муй пут тайдан?
– Па хоты, иваң-асаң хоят муйл антом: кат ан, кат пут!

– Кеши, муй дайм тайдан?

– Кат дайм, кат кеши!
– Хоты, ёхи лэпдам?
– Лэпдан, лэпдан!

Ин икен ёхи щити вуратал:

– Охо, хидые, ов хоплан ёхи щити талдалдам!

– Па лув ат ул, акие, щаха донщоплайт. Лоңа, лоңа!

Ин икел, таңха, лапатдалды.

– Хидые, – ястыдыл,
– ма наң олмен рата лаңклэм...

– Па хоты, акие, лаңки.

Наң хоты ун хоят.

– Ма олдем, – акел ики ястыйл, – ов луңка хатщалэм.

Ин щалта, таңха, войпты юпийн акел икийн ёхи щити лэда, сулдал пут юха ёвардайт, охал па ов хопа омасла...

Ин Сот Панны Ар Панны Ики Порнэнан апралда: «Мана, мана, иваң-асаң эвен ин хоты молты ал актас». Ин ики ястыйл: «Ит яма питама сахат хол хун яма питлат». Па холща! «Яңха, яңха!».

Ин Порнэ имелан парда, Сот Панны Ар Панны Ики па щити шушмас. Эвел хот лепа ёхтас па хот ныты вушан: «Эвем па, таңха, шаңкапса, хот овал пелки понмал...». Тохи ёхтас па эвел ох пушхал ов хопан омасал, сулдал пут юха ёвартамат. Холдаман-ёсламан, ловад-сомал



яха акатдалды, хира пондалды па ёхи щити талдалды.

Ин амплэңкелан па щити худмаса: «Во-во-во! Сот Панны Ар Панны Икен иваң-асаң эвел элты хала ловаң тэдаң ухад, доңхи ловаң тэдаң ухад талад. Холдаман-ёсламан таласал». «Ивлап-аслап, хоратты ант хошлан, – Порнэ ими ким па щити этмал, – тамиты хорта: «Сот Панны Ар Панны Ики иваң-асаң эвел элты шанш вояң, потам вояң тэдаң ухад талад, арыман-монщман, таласал». Худантыйл: икел яна холдал: «Муйл холдал, ал арийл!» Лув, таңха, ёхи лоңемал.

Лув доңгал юпийн амплэңкел па щити хоратал: «Во-во-во! Сот Панны Ар Панны Ики иваң-асаң эвел элты хала

ловаң тэдаң ухад, доңхи ловаң тэдаң ухад талад, холдаман-асламан таласал». «Ивлап-аслап, иваң-асаң эвел элты муя па холдаман-ёсламан таласал? Щиты яста: «Шанш вояң тэдаң ухад талад, потам вояң тэдаң ухад талад». Лув ёхи па лоңемас, йи антам нэ сохалан.

Ин амплэңкел па щити хоратал: «Во-во-во! Сот Панны Ар Панны Ики иваң-асаң эвел элты хала ловаң тэдаң ухад – доңхи ловаң тэдаң ухад талад, холдаман-ёсламан таласал». Ин Порнэ ими ким навармал. Ийикел, ким этмас па, яна па – холдаман таласал. «Молхатал, – Сот Панны Ар Панны Ики Порнэ ими пелда ястал, – «Молхатал амтыдысан – тата щити – вуй!»

Ин хир ов пелки эңхопла, эвел ох пушах хир ован. Ин Порнэ ими туп ад доилыйл. Ин Сот Панны Ар Панны Ики щалта ин Порнэ имел йи пелкал хуры лован кирдалды, кимет пелкал ром лован кирдалды: «Йи пелкен унта ат туда, йи пелкен уйта ат туда! Там юпийн тамащ пил па ант ат тайдам!».

Ин Сот Панны Ар Панны Ики Вошаң урт ханомлад пидан, таңха, иса луңан ки – вот няваң юшал ант холлийл, тал ки – хомп сэмпи сэмаң доңщаң юшал ант питыдыла. Щиты щити мойдаман-тотдаман холал. Щити, таңха.

Леонтий Антонович Тарагупта
мутрая ханшам монщ
Нёрапса хиды Любовь Возелова
нэпека ханшам монщ



Хор: Любовь Возелова

Тал худ ведпасдаты пора етшас

Тал худ ведпасдаты пора си етшас. Ведпасдаты ёх тыдась сютсэдат па луң пораяда дэсытыты питлдат. Тампуш талан па товийн шеңк иськи ус. Туп худ ведпасдаты хоятлуд иси па рупитсат, пландал тэкаптасдал, худдал масдал.

Ведпасдаты ёх нётапса

Шоши мир ёх, хой тасян яңхал, хой худ-вой ведман ул, хол шоши мир ёх пидан рупитты департамент эдты нётапсайн маты па охан нётты верэл ул. Ханты, ур па ёрн ёх хольмаң педа лапат пормас шитты верытлдат. Мосты от вуты ураңан, заявление ханшты па очередь дойты мосал. Си порайн туп мосты пормасан мадайт.

Худ ведпасдаты хоятат сохал, карты кур, хот доңал лаңкты сох па си ураңан мосмитты картлуңк па па отат шитты верытлдат. Хасям талан кусяйт ведпасдаты ёх пидан уйтантыман, холна ялап верат ялпитсат. Кат тал йи пуш йи хоттэд кат холап па кат жилет ёша паятты верытлдат. Жилетдал хойм лыпат оляп тайты верэл ул. Тут маты па юх эватты пормасңан ураңан, ялап тал тыдась эдты ёхды маты охал хольмаң сёрс унты эдатса. Си пормасңан ураңан лутты бензин, тал йи пуш катхосьяң сёрс солкувайн сохаптадайт. Кашң хулам тыдась сьс холна хулам сёрс солкува ёша паятты верытлдат.

Хоты тал пора манас

Хоты худ ведпасдаты пора тал сьс манас, Лоркерт рыбоучастка луңтасты худ ведпасдаты ху Иван Тимофеевич Яркин потар тус: «Тал сьс холпат пон-

ман тайсув. Еша худ мосятсув. Асэв поттыйн, ухад еңк порайн, холаплуд пондаллуд, омасты кеншак ат ус. Ас халты унты холаплуд ситы си омасдат. Еңкал кула йиты юпийн, холаплуд ныкшак хатлталлуд, нох ант ат потсайт. Худлуд сарах холапан мосятлаллуд, уншак сорт – хар холапан. Шик холпа айшак худ хойл. Сорт, мевты ялап тал тыдась эдты ай кер тыдась етшаты унты манал.

Сялта па пунап, рюша эдты верам ота, худлуд мосятлуд. Ас халты леп



ёхатлэв, шимда йил – нык манал. Каматса хатл сьс соймев па дылаң йиңкан этал, худан па ёхатла. Сялта па нох ёхатлэв. Си ураңан вошам хир омаслуд, юх верман тайлуд. Нэмад лудлах.

Ин тыдась сютсэман, тови педа дэсытыты питлуд: ялап холпат ёнтлуд, холаплуд дэсытлаллуд. Кедан, кукалайн масаюв. Йиңк этал, холпат мохты понты питлуд».

Худ ведпасдаты хоятлуд тыдась сьс яма ат сютсэдат па луң ведпасдаты порая туңа-сира дэсытыдат. Луң ведпасдаты пораяд кеншака ат манал, холапдал ар худан ат ёхатдайт.

Альбина Тырлина ханшам потар



Хор: Альбина Тырлина

Газета «ДУХ АВТ»

Адрес редакции:
629003, ЯНАО,
г.Салехард,
мкр. Богдана Кнуянца,
д. 1, каб. 106
+7 (34922) 4-68-63
E-mail:
luh.avt@yamal-media.ru

Учредитель
Департамент внутренней политики
Ямало-Ненецкого автономного округа
(629008, ЯНАО, г.Салехард, пр-кт Молодёжи,
д. 9, каб. 708)

Газета зарегистрирована
Управлением федеральной службы по надзору
в сфере связи, информационных технологий
и массовых коммуникаций по Тюменской
области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1300 Заказ 125 тз
Подписные индексы:
на год – ПА700, на полугодие – ПР561

№ 15 (1318)
Газета вышла в свет 11 апреля 2026г.
Подписано в печать 9 апреля 2026г.
по графику: 16.00
фактически: 16.00
Газета выходит по субботам

Цена годовой подписки 88 руб.,
в розницу не распространяется

Издатель
Департамент внутренней политики ЯНАО
(629008, ЯНАО, г.Салехард,
пр-кт Молодёжи, д. 9, каб. 708)

Отпечатано в АНО «Ямал-Медиа»
Юридический адрес: 629003, Ямало-
Ненецкий автономный округ, г. Салехард,
мкр. Богдана Кнуянца, д. 1, каб. 106
Фактический адрес: 629007, Ямало-
Ненецкий автономный округ, г. Салехард,
ул. Чубынина, д. 39А

И. о. генерального
директора
АНО «Ямал-Медиа»
Хатанзейский
Олег Геннадьевич

Главный редактор
Яковлева
Алина Кирилловна